

Namminersorlutik Oqartussat iluanni aammalu suliffeqarfiit Namminersorlutik Oqartussat pigisaasa iluanni atorfilittat qullersaasa tullersortaasalu 60 – 70 %-ii piginnaasaqarnikkut tulluartut marlunnik oqaaseqartuunissaat anguniarlugu ukiut qulit ingerlaneranni sulisussarsiuissinnermut tunngaveqartitsisussamik atorfinitsitsisarnermut aalajangersimasumik anguniagaqarnissamut periusissiornermut, ilinniartitaanermullu ilinniaqqinnermullu periusissiamik UPA 2017 sioqqullugu Naalakkersuisut saqqummiussaqaqqullugit peqquneqarnissaannik Inatsisartut aaliangiiffigisassaattut siunnersuut.

(Inatsisartunut ilaasortaq Peter Olsen, Inuit Ataqtigiit)

Akissuteqaat

(Aningaasaqarnermut Akileraartarnermullu Naalakkersuisoq)

Aappassaaneerinnineq

Inuussutissarsiornermut Aatsitassanullu Ataatsimiititaliaq Naalakkersuisut sinnerlugit isumaliutissiissutaanut qujassuteqarfigaara.

Inuussutissarsiornermut Aatsitassanullu Ataatsimiititaliami amerlanerussuteqartut allannguutissatut siunnersuut una akuersissutigineqarnissaanik innersuussutigigaa, Naalakkersuisut maluginiarpaat:

Ilinniartitaaneq ilinniartiteqqiinerillu aqqutigalugit, Namminersorlutik Oqartussat iluanni aammalu suliffeqarfiit Namminersorlutik Oqartussat pigisaasa iluanni atorfilittat qullersaasa tullersortaasalu ukiut tallimat iluanni 60 – 70 %-iisa piginnaasaqarnermikkut kalaallisut qallunaatullu oqalussinnaasuunissaat anguniarlugu sulisussarsiuissisarnermut atorfinitsitsisarnermullu aalajangersimasumik anguniagaqarnissamut periusissioqqullugit Naalakkersuisut peqquneqarnissaannik Inatsisartut aaliangiiffigisassaattut siunnersuut.

Naalakkersuisut pineqartumi suliniutit aallarleriigaat Inuussutissarsiornermut Aatsitassanullu Ataatsimiititaliap pitsaasutut naapertuuttutullu isigimmagit, Naalakkersuisut iluarisimaarpaat. Makku pineqarput:

- Sulisut oqaatsinik pikkorissarnissaanik neqeroorfigineqartarput
- Pisortat ineriartornissamut pikkorissarnissamut neqeroorfigineqartarput
- Pisortassatut piukkunnaatillit nunaqavissut siunissami pisortannorsinnaanissaat siunertaralugu pikkorissarnissamik neqeroorfigineqartarput
- Sulisussarsiornermi periusissatut pilersaarut sulisunut Kalaallit Nunaannut immikkut attuumassutilinnut tulluarsagaq
- Kalaallit qaffasissumik ilinniaqallit atorfinissinnaanissaat siunertaralugu suliffissanik saqqummersitsinernik ukiut tamaasa ingerlatsisoqartarpoq

Pineqartumi peruserineqartut nunaqavissunik piukkunnaatilinnik amerlanerusunik isumalluutissaqalernermik nassataqarsinnaanera Naalakkersuisut isumaqatigaat.

Peqatigisaanillu atorfinitsitsisarnermi periutsip nunami maani innuttaasunik siunertarinngisamik toqqaannanngitsumillu assigiinngisitsinermik nassataqannginnissaa qulakkeerneqarnissaanik ataatsimiititaliaq isummertoq Naalakkersuisut maluginiarpaat. Naalakkersuisut taamatut isummerneq isumaqatigaat.

Taamaalillutik Naalakkersuisut Inuussutissarsiornermut Aatsitassanullu Ataatsimiititaliap allannguutissatut siunnersuutitut saqqummiussaata akuersissutigineqarnissaa taperserpaat, Inatsisartunilu suliarineqarnissaa qilanaaralugu.